



12 April 2013
12 April 2013
P.U. (A) 138

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PEMULIHARAAN HIDUPAN LIAR (PAMERAN) 2013

WILDLIFE CONSERVATION (EXHIBITION) REGULATIONS 2013



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PEMULIHARAAN HIDUPAN LIAR 2010

PERATURAN-PERATURAN PEMULIHARAAN HIDUPAN LIAR (PAMERAN) 2013

PADA menjalankan kuasa yang diberikan oleh perenggan 132(2)(e) Akta Pemuliharaan Hidupan Liar 2010 [*Akta 716*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Pemuliharaan Hidupan Liar (Pameran) 2013**.

(2) Peraturan-Peraturan ini mula berkuat kuasa pada 15 April 2013.

Tafsiran

2. Dalam Peraturan-Peraturan ini—

“doktor veterinar” ertinya seseorang yang didaftarkan di bawah Akta Doktor Veterinar 1974 [*Akta 147*];

“pameran” ertinya suatu aktiviti pameran bergerak atau pameran tetap yang melibatkan hidupan liar;

“pameran bergerak” ertinya suatu aktiviti mempamerkan secara sementara hidupan liar di mana-mana premis dan dibuka kepada umum;

“pameran tetap” ertinya suatu aktiviti mempamerkan secara tetap hidupan liar di mana-mana premis dan dibuka kepada umum;

“pengendali pameran” ertinya mana-mana orang yang menjalankan aktiviti pameran hidupan liar, sama ada secara bergerak atau tetap.

Kehendak bagi permit

3. (1) Tiada seorang pun boleh menjalankan pameran hidupan liar melainkan jika dia memegang suatu permit yang dikeluarkan di bawah perenggan 10(1)(c) Akta.

(2) Tiada seorang pun boleh menggunakan mana-mana hidupan liar yang dilindungi sepenuhnya bagi aktiviti pameran hidupan liar melainkan jika dia memegang suatu permit khas yang dikeluarkan di bawah perenggan 11(e) Akta.

(3) Pengendali pameran hendaklah melantik seorang doktor veterinar sepanjang tempoh pameran dijalankan.

(4) Aktiviti pameran hidupan liar hendaklah diadakan di premis yang dinyatakan dalam permit yang dikeluarkan di bawah peraturan ini.

Fi

4. (1) Fi yang kena dibayar bagi suatu permit yang dikeluarkan adalah seperti berikut:

(a) satu ratus ringgit untuk suatu pameran bergerak; dan

(b) tiga ratus ringgit untuk suatu pameran tetap.

(2) Fi hendaklah dibayar kepada pegawai pelesen melalui apa-apa cara sebagaimana yang ditentukan oleh pegawai pelesen.

Pameran bergerak

5. (1) Hidupan liar yang dibenarkan untuk tujuan pameran bergerak adalah sebagaimana yang dinyatakan dalam Jadual Pertama.

(2) Pengendali pameran hendaklah memastikan hidupan liar yang dipamerkan itu —

(a) boleh bergerak bebas dalam kurungan yang berukuran sesuai dan selesa;

- (b) ditempatkan dalam kurungan dalam bilangan yang bersesuaian dan tidak bersesak-sesak; dan
- (c) ditempatkan dalam kurungan yang mempunyai pengudaraan yang baik,

semasa pameran dijalankan dan semasa pemindahan hidupan liar.

(3) Pengendali pameran hendaklah memastikan bahawa kurungan dan peralatan yang digunakan untuk tujuan pameran hidupan liar itu disenggara secara berkala bagi tujuan keselamatan.

(4) Pengendali pameran hanya boleh mengadakan pameran bergerak bagi suatu tempoh yang tidak melebihi 14 hari di sesuatu lokasi pada satu-satu masa melainkan dengan kelulusan Ketua Pengarah.

Kurungan

6. (1) Kecuali bagi kelas insekta dan araknida, pengendali pameran tetap hendaklah menyediakan kurungan yang bersesuaian bagi setiap spesies hidupan liar mengikut saiz sebagaimana yang dinyatakan dalam Jadual Kedua.

(2) Kurungan itu hendaklah mempunyai reka bentuk yang sesuai dengan kelakuan semulajadi dan keperluan asas hidupan liar itu.

(3) Reka bentuk kurungan yang disediakan oleh pengendali pameran tetap itu hendaklah dikemukakan kepada Ketua Pengarah untuk kelulusan.

Penjagaan kesihatan hidupan liar

7. (1) Pengendali pameran adalah bertanggungjawab untuk memastikan penjagaan kesihatan hidupan liar di bawah kendaliannya.

- (2) Bagi maksud subperaturan (1), pengendali pameran hendaklah—
- (a) melantik seorang doktor veterinar;
 - (b) menyediakan klinik veterinar di premis pameran tetap itu;
 - (c) menanda dan merekodkan setiap kelahiran hidupan liar;
 - (d) menyenggara dan menyimpan rekod mengenai semua perkara yang berhubung dengan pengurusan setiap hidupan liar;
 - (e) menyenggara dan menyimpan rekod penjagaan kesihatan hidupan liar;
 - (f) menyenggara dan menyimpan rekod pemakanan setiap hidupan liar; dan
 - (g) melaporkan apa-apa kematian hidupan liar yang dijangkiti atau disyaki dijangkiti penyakit kepada pihak berkuasa veterinar mengikut kehendak di bawah Akta Binatang 1953 [*Akta 647*].
- (3) Perenggan (2)(b) tidak terpakai bagi pengendali pameran bergerak.
- (4) Subperaturan (2) tidak terpakai bagi kelas insekta dan araknida.

Kawasan kuarantin

8. (1) Pengendali pameran tetap hendaklah menyediakan suatu kawasan kuarantin bagi penempatan atau pengasingan sementara mana-mana hidupan liar yang baru diperolehi untuk tujuan pencegahan atau rawatan apa-apa penyakit yang mungkin dihidapi oleh hidupan liar itu.